

Dar als juvenils ina vusch enteifer la baselgia catolica

Magliar spaghettis e discutir davart igl avegnir dalla baselgia catolica

DA MARTIN CABALZAR

„ **Cun in niev recept vul la baselgia catolica dil Grischun envidar la giuventetgna e giuvens carschi digl entir Grischun da seser ensemen, magliar spaghettis ed aschia promover il scomi da meinis davart la veta e la cardientscha.**

«In pac spaghettis, in migiel agl d'uors fatgs sez ed ina pintga butteglia sirup.» Tut products indigens. Quei che tuna sco ina gliesta da far cumissions fuorma la basa dil set da pastatalk dil project «Jugend@Kirche». La baselgia catolica dil Grischun ha instradau quei project cugl intent da motivar la giuventetgna e giuvens carschi da discutir davart damondas dalla veta en general e dalla cardientscha en special. Per obtener quei set ston ins denton gnanc ir en stizun buc, el sa vegnir empustaus gratuitamein sin www.jugend@kirche.ch.

Ina tschavera cun amitgs e collegas

Quei dialog e quei scomi da meinis sa succeder il meglier el rom d'ina tschavera denter amitgs e collegas sin fundament dil set da pastatalk che vegn mess a disposiziun gratuitamein. Il set cumpeggia buca mo las ingredienzas materialas per la tschavera, anzi, era ingredienzas spirtalas. Sin 10 sets da meisa cattan ins damondas che concernan la veta, la cardientscha e la baselgia. «Nus havein sapientivamein buca limitau las damondas silla tematica baselgia, mobein schau in lartg spazi tematic, puntuescha il luvrer da giuventetgna dalla baselgia catolica dil Grischun *Claude Bachmann*.

Damondas provocontas

Aschia san damondas sco: Tgei dat a mi tegn e sustegn ella veta? procurar per discussiuns intensivias e profundas. Las discussiuns duein succeder a moda autonoma, senza ch'ellas vegnien empaladas e dirigidas d'ina persuna delegada dalla baselgia, di Bachmann. Impuls per discussiuns duein era ils cartuns sut las bubrondas che cuntegnan ina tesa in smiul provoconta dar. Sco exempel menziuna Bachmann la damonda davart la pusseivladad d'ina papa feminina. Quei evocheschi naturalmein autras damondas parentadas sco la rolla e la funcziun dalla dunna ella baselgia ni era davart l'ordinaziun da dunnas.

Il papa envida alla discussiun

Il project giuventetgna@baselgia ei vegnius lantschaus en vesta alla proxima sinoda dils uestgs ch'ha liug quest atun a Ruma. A quella reuniun vegnan uestgs digl entir mund a s'entupar a Ruma per discutir davart il tema «Giuventetgna – cardientscha – vocaziun. En ina sinoda preliminar han rodund 300 juvenils e giuvens carschi da tut ils continents discutau a Ruma cun papa *Francestg* davart damondas dalla veta, dalla cardientscha e dil senn. La finamira da papa Francestg seigi da dar alla giuventetgna ina vusch che vegn era udida enteifer la baselgia.

Survegnir ina vusch

Els set da pastatalk cattan ina era ina carta da risposta nua ch'ins sa nudar ulteriurs puncts da discussiun e dar impuls per ulteriuras damondas. Quellas cartas san ins era tarmetter anavos al speditur. Cheutras han juvenils e giuvens carschi la pusseivladad da separticipar ad in process che cumpeggia igl entir mund, puntuescha Bachmann. El vegn a rimnar tut ils giavischs che vegnan allura discutai en ina runda da discussiun ch'ha liug ils 20 d'october a Cuera. Da quella sessiun duein buca mo juvenils, mobein era ils representants dalla baselgia prender part, cunzun per tedlar ils basegns dalla giuventetgna. Dad ina vart setracti ei da dar impuls alla giuventetgna, dall'autra vart vul il project era dar sapientivamein ina vusch alla giuventetgna per ch'ella catti era ureglia enteifer la baselgia, puntuescha Bachmann. Ei seigi era ina finamira da risguardar ils basegns dalla giuventetgna ella lavur quotidiana dalla baselgia catolica el Grischun. Quei succedi aunc bia memia pauc, ei Bachmann cunscients. Per el seigi il problem cardinal il fatg che la baselgia catolica sefetgi sin certas caussas e tscherchi buc il dialog cun carstgauns giuvens, di Bachmann. La finala mondi ei per la damonda tgei che la baselgia sappi emprender, era dalla giuventetgna. Sin via a quella finamira seigi il set da pastatalk in emprem pass. Tschunconta sets ein preparai tier Jugend@Kirche per vegnir tarmess. Empustai san els vegnir sut la homepage cul medem num. Ils cuosts da quei project porta la baselgia catolica dil Grischun.



Pasta sco impuls per discutar davart damondas da cardientscha: Eva Maria Faber, Claude Bachmann e Ladina Seglias (da sen.) presentan il project lantschaus dalla baselgia catolica dil Grischun. FOTO O. ITEM